

# **Bengkel ADD BH bantu proses PDP. Guru di Labuan manfaatkan pendedahan format terkini UPSR**



Panjangkan masa serta dianjurkan dua kali setahun. Demikian harapan warga pendidik dari pulau bebas cukai ini yang menyertai Bengkel Akhbar Dalam Darjah (ADD) 2017 anjuran akhbar BH dengan kerjasama Pasukan Guru Bahasa Melayu Sekolah Rendah Wilayah Persekutuan Labuan dan Jabatan Pendidikan Labuan, di sini, kelmarin.

Seramai 120 peserta terdiri daripada guru Bahasa Melayu dan Matematik di wilayah ini menyertai bengkel berkenaan yang dikendalikan penceramah berpengalaman merangkap penulis sisipan Didik BH.

Guru Bahasa Melayu Sekolah Kluster Kecemerlangan Rancharanca, Rositah Abd Rahman, berkata beliau sanggup mengikuti bengkel itu di Kota Kinabalu pada tahun lalu kerana pengisian diberikan penceramah mampu diaplikasikan kepada murid.

Katanya, apabila mengetahui bengkel berkenaan akan

diadakan di wilayah ini, beliau tidak melepaskan peluang untuk menyertainya sekali lagi.

Beberapa guru lain yang ditemui juga sependapat, bengkel itu terbukti memberi ilmu tambahan dalam aspek pengajaran dan pembelajaran (PDP).

Guru Matematik Sekolah Kebangsaan (SK) Pekan Satu, Zainol Anuar, berpendapat bengkel itu memberi input mengenai format baharu bagi subjek berkenaan daripada penceramah berpengalaman.

“Pengkongsian mengenai cara pemarkahan boleh digunakan oleh guru untuk diajar kepada murid,” katanya yang berharap masa pengajuran bengkel dapat dipanjangkan bagi membolehkan guru mendapat lebih banyak input dan ilmu tambahan membabitkan subjek yang diajar.

Penyelaras Program Cikgu Hasnan Saad.

Dipetik dari Media Berita Harian : 25 Januari 2017

---

## **500 guru hadiri Majlis Perutusan Tahun Baharu 2017**



**21 Jan 2017** – Hampir 500 warga guru telah menghadiri Majlis Perutusan Tahun Baharu 2017 , Jabatan Pendidikan Wilayah Persekutuan Labuan yang diadakan di dewan Sekolah Antarabangsa Labuan (LIS).

Pengarah Jabatan Pendidikan W.P Labuan, Encik Raisin Saidin menyampaikan amanat dan perutusan Tahun Baharu 2017 serta sedutan Menteri Pendidikan Datuk Seri Mahdzir Khalid dan ucapan Ahli Parlimen Labuan Datuk Rozman Isli.

Sambil mengucapkan terima kasih atas kehadiran tetamu termasuk pesara guru, Encik Raisin Saidin meminta semua pihak khususnya ibu bapa dan komuniti sentiasa berkerjasama dan berganding bahu dengan pihak jabatan dan sekolah untuk mencemerlangkan pendidikan anak-anak di sekolah rendah dan menengah di Wilayah Persekutuan Labuan.

Katanya komitmen semua pihak termasuk jabatan dan agensi kerajaan serta swasta dan pemimpin masyarakat dalam memastikan kecemerlangan pendidikan di Labuan amat diperlukan kerana kejayaan anak-anak merupakan milik semua warga Wilayah Persekutuan Labuan.

Beliau juga berharap ibu bapa akan terus memainkan

peranan utama mereka menerusi PIBG membantu pihak sekolah menjayakan pelbagai program khususnya yang berkaitan dengan akademik.

Turut hadir Ahli Dewan Negara, Senator Datuk Yunus Kurus, Ketua Sektor Pengurusan Sekolah Maimoon Matnoh selaku penggerusi pengelola dan Pengerusi Dewan Usahawan Melayu Labuan ( DUML ) Dato' Sri Mohd Alias Abd Rahman.

Majlis yang bermula jam 8 pagi itu dimeriahkan dengan persembahan koir lagu-lagu patriotik yang disampaikan oleh SMK Labuan dan bacaan lafaz ikrar Perkhidmatan Awam dan Rukun Negara yang diketuai oleh Pengetua SMK Rancha-Rancha Omar Baki Matusin.

Turut diadakan penyampaian Anugerah Tokoh Teladan Integriti kepada empat penerima yang terdiri daripada pegawai, pengetua dan ibu bapa cemerlang.





---

## **Merentas desa ke 7 SK Pantai sukses**



**21 Jan 2016** – Seramai 450 murid mengikuti aktiviti merentas desa kali ke-7 sejauh empat kilometer yang bermula di Padang Majal Pancur Hitam, Kg Pohon Batu yang melibatkan murid tahun tiga hingga tahun enam. Majlis penutupan telah dirasmikan oleh Guru Besar SK Pantai, Mahani Hj Hussin. Menurut Mahani, aktiviti merentas desa merupakan acara tahunan yang diadakan sebagai acara pembukaan aktiviti unit kurikulum sebelum kejohanan olahraga tahunan berlangsung.

“Antara objektif aktiviti dijalankan adalah untuk memupuk silaturahim di kalangan murid dan warga sekolah. Malah aktiviti seperti ini dapat membudayakan gaya hidup sihat dan dapat mencungkil bakat baharu di kalangan warga sekolah dalam olahraga”, katanya.

Majlis turut dihadiri oleh Penolong Kanan Pentadbiran Faridah Amit, Penolong Kanan Kokurikulum Abdul Kahar Abdul Rahim, Penolong Kanan HEM Azlina Abdul Garip dan Penolong Pendidikan KHas Halifah Salim. Majlis Penutupan diakhiri dengan penyampaian pingat dan hamper kepada para pemenang.

Johan keseluruhan dimenangi oleh pasukan Rumah Merah, manakala naib johan dimenangi oleh Rumah Hijau dan tempat ketiga jatuh kepada pasukan Rumah Biru.

**Dipetik dari Utusan Borneo**

---

## Program Transisi Tahun 1 SK Pekan Dua



Pengarah Jabatan Pendidikan Labuan Raisin Saidin telah menyempurnakan Majlis Penutupan Program Transisi Tahun 1 Sekolah Kebangsaan Pekan Dua (SKPD) di Dewan Gemilang SK Pekan II, Selasa lalu.

Seramai 107 murid Tahun Satu terlibat dalam program itu yang bermula jam 8 pagi. Mereka mengikuti pelbagai

aktiviti termasuk nyanyian, sukaneka, pertandingan membina akuarium, belajar abacus dan projek menanam taugeh pada 3- 13 Januari lalu.

Murid- murid bersama guru- guru dan tetamu menyanyikan tiga lagu patriotik iaitu Negaraku, Wilayah Persekutuan Maju dan Sejahtera serta Gemilang disusuli bacaan doa oleh Ustaz Aska Achbar dan Bacaan Ikrar Murid oleh Mohamad Zakry Zaquan Shaiful Rizal.

Turut berucap pada majlis itu ialah Penolong Kanan Pentadbiran Hajah Tengku Yasmin Tengku Ibrahim yang mewakili Guru Besar Awgku Damit @Ak Chuchu Pengiran Mohd Yassin.

Selepas ucapan Raisin, majlis itu diserikan dengan persembahan Multimedia Minggu Transisi 2017, persembahan nyanyian solo murid dan penyampaian cenderahati transisi ( wakil ketua kelas dan penolong).

Turut diadakan, penyampaian hadiah pertandingan membina akuarium yang dimenangi Nur Soleha Delminda (1B), Mersa Elson (1B) dan Aedrey Reymil (1T).

Empat murid pula menerima hadiah Murid Contoh Mengikut Kelas iaitu Nur Syahirah Ramdhan Dzulfikar (1Z), Jimmy Jemsin (1T), Nur Nia Ramadhani Rhadmil (1B) dan Nur Felisyah Qedryna (1M).

Manakala Anugerah Murid Terbaik diberikan kepada Alexandra Hazel (1T) dan Mohamad Zakry Zaquan Shaiful Rizal (1Z).

Empatbelas murid Tahun Satu yang lahir pada bulan Januari turut teruja apabila pihak sekolah meraikan mereka dengan acara memotong kek sambil disaksikan ibu bapa dan guru-guru.

Mereka ialah Muhammad Aiyub Ismail ( 1Z), Nur Alissa

Najira Abdul Taha ( 1Z), Nur Aqilah Damia Mohd Daud (1Z), Nur' Alya Dania Syafiqah Muhammad Shah ( 1Z), Putri Alisya Abdullah ( 1Z), Mohamad Adizan Masrin (1T), Nurul Hazira Nasip (1T), Adi Putra Isma Khairuddin Augustine Abdullah ( 1B), Al-Fazeer Abdullah (1B), Muhammad Alif Mukhriz Abdul Mukim (1B), Nazrin Raja (1B), Nurul Syazwanie Abdullah ( 1B), Mohammad Firdaus Mat Sam (1M) .

Majlis itu diakhiri dengan persembahan murid, Madley Pokok Mulberry dan 5 Buku serta sesi bergambar.

Selepas rehat, ibu bapa mendengar Taklimat KSSR Semakan 2017 oleh Penyelia Unit Sains dan Matematik Irham Hamid dan Program Bakti Linus Tahun 1 oleh Ketua Unit Linus Afandi Nasir.

Raisin berharap ibubapa akan terus memberikan kerjasama kepada pihak termasuk memastikan kehadiran penuh anak mereka ke sekolah selain hadir pada program anjuran sekolah dan PIBG.

*“Sudah tentu pihak sekolah memerlukan kerjasama dan komitmen ibu bapa dalam menjayakan program anjuran sekolah dan PIBG”, Encik Raisin Saidin.*

Beliau turut mengucapkan terima kasih atas komitmen guru-guru yang menjayakan pelbagai program sepanjang tahun lalu.

Sementara itu, Tengku Yasmin merakamkan ucapan terima kasih kepada ibu bapa yang memilih SK Pekan Dua sebagai pilihan mereka menghantar anak ke Tahun Satu sekaligus menjayakan slogan sekolah ‘Labuan Hebat, SK Pekan Dua Gemilang’.

“Program transisi adalah untuk memberikan pengalaman awal kepada murid agar mereka lebih yakin dan berdisiplin sepanjang tahun 2017,” katanya.

Turut hadir, Ketua Unit HEM Haji Jaafar Abu Bakar, Penolong Kanan HEM Sabar Dalimin dan Penolong Kanan Kokurikulum Rahman Jaafar.

---

## **SMK Labuan dan LIS anjur Perkongsian Amalan Pembelajaran Abad Ke-21..**



14 Januari : SMK Labuan dengan kerjasama Labuan International School (LIS) dan PIBG SMK Labuan telah menganjurkan Perkongsian Amalan Pembelajaran Dan Pemudahcaraan (PDPC) Abad Ke- 21 yang berlangsung di Auditorium Labuan International School (LIS), pada Sabtu.

Seramai 500 orang yang terdiri daripada semua guru SMK

Labuan dan LIS, Ketua-Ketua Sektor dan Ketua Penolong Pengarah BTPN Jabatan Pendidikan WP Labuan serta Pegawai-pegawai Jabatan Pendidikan WP Labuan menghadiri program tersebut.

Perkongsian tersebut telah disampaikan oleh Guru Cemerlang Sains SMK Jerlun Kedah, Norhailmi Abdul Mutalib.

Pengetua SMK Labuan, Ismail Abdullah berkata selain daripada menjadi sebahagian hasrat dalam PPPM 2013-2025 untuk mencapai pendidikan berkualiti, dalam Standard Kualiti Pendidikan Malaysia Gelombang 2 (SKPMg2) juga jelas menyatakan Pembelajaran dan Pemudahcaraan (PdPc) merupakan perkara yang sangat penting yang menentukan standard kualiti pengurusan kurikulum sesebuah sekolah.

Katanya, Standard 4 SKPMg2 meletakkan standard ‘Guru berperanan sebagai pemudah cara dalam pembelajaran dan pengajaran yang berkesan untuk memperkembangkan potensi murid secara menyeluruh dan pencapaian murid pada tahap optimum yang berterusan’.

Ismail berkata terdapat enam aspek dalam Standard 4 ialah guru sebagai perancang, guru sebagai pengawal, guru sebagai pembimbing, guru sebagai pendorong, guru sebagai penilai dan murid sebagai pembelajar aktif.

“Program hari ini merupakan satu tindakan awal ke arah memberi kefahaman yang lebih mendalam tentang amalan PdPc Abad Ke 21. Saya yakin kita semua teruja dengan hal ini. Program ini yang pada asalnya hanyalah satu program Latihan Dalam Perkhidmatan (LDP) antara SMK Labuan dan LIS, telah mendapat sambutan di luar dugaan dalam kalangan guru-guru sekolah di WP Labuan,” katanya.

Menurut Ismail, penyertaan melebihi 500 orang hari ini sudah mencapai satu pertiga daripada jumlah guru di Wilayah Persekutuan Labuan.

Tambahnya, namun ini bukanlah satu program lengkap yang dapat merangkumi semua keperluan pelaksanaan PdPc Abad Ke 21.

Tentunya memerlukan tindakan susulan di peringkat sekolah terutama peringkat panitia mata pelajaran untuk membincangkan lebih teliti dan berfokus strategi PdPc mata pelajaran masing-masing melalui pelbagai medium termasuklah Professional Learning Community (PLC).



Cikgu Hailmi menerima cenderahati dari Pengetua LIS

“Program ini hanya satu sumbangan kecil SMK Labuan dan LIS, tapi kami yakin tindakan susulan yang berterusanlah yang akan menentukan impak sebenar kepada prestasi sekolah dan WP Labuan secara keseluruhannya,” katanya.

Antara kejayaan /anugerah yang pernah dicapai oleh Norhailmi Abdul Mutalib ialah Blog Pendidikan Terbaik (Malaysia Social Media Awards 2014), Agent For National Transformation 2014 (MCMC), Blog Pendidikan Terbaik (UPSI), Peserta Program Pertukaran Guru Malaysia – Korea (KOMTEP) 2015 dan Blog Kandungan Pendidikan Terbaik (Malaysia Social Media Awards 2016).

Menurut Ismail, perkongsian tersebut antaranya tentang

bagaimana guru-guru boleh melaksanakan Pembelajaran dan Pemudahcaraan (PdPc) Abad Ke 21 dalam mata pelajaran masing-masing berpandukan contoh-contoh yang pernah dilaksanakan oleh Norhailmi di sekolahnya.

Banyak perkongsian tentang PdPc Abad Ke 21 boleh dirujuk dalam laman web [www.cikguhailmi.com](http://www.cikguhailmi.com) Turut hadir Ketua Sektor Pengurusan Sekolah, Maimoon Matnoh, Ketua Sektor Pengurusan Akademik, Norismah Abd Moin, Ketua Sektor Jaminan Kualiti, Khaziyati Osman, Ketua Penolong Pengarah BTPN Labuan, Ag Marten Abd Rahman, Ketua Sektor Pengurusan Maklumat, Samsudin Yala dan Yang Dipertua Majlis Pengetua Sekolah Malaysia Cawangan Labuan, Omar Baki Matusin.

Dipetik dari laman New Sabah Times

Gambar dari Blog CikguHailmi.com

---

## **Pelancaran Program IM Free, Program Nilam, Program Mai Tah ke Sekolah 2017**



Antara aktiviti-aktiviti sekolah pada 16 Januari 2017.



Pelancaran Program IM Free  
oleh Guru Besar SK Sungai Bedaun,  
Puan Dg. Sarifah A. Mahmod.



Pelancaran Program Mai Tah  
ke Sekolah, Sekolah Kluster Kecemerlangan SK Ranch-Rancha oleh Encik Busman bin Borahima.



Pelancaran Program Nilam  
SMK Pantai IBWS oleh Pengetua Encik Sahar Misron.

---

## Ustaz Roslan Mohamed – Jasamu Sentiasa Dikenang

Raut wajah damai dan tenang  
Tiada terkalam kasih dijunjung  
Jasa baktimu tetap dikenang  
Budi baikmu tetap disanjung

Ayam rintik di pinggir hutan  
Nampak dari tepi telaga  
Nama yang baik jadi ingatan  
Seribu tahun terkenang juga



Selamat Bersara - Ustaz Roslan bin Mohamed

**6 Januari** – Jasamu sentiasa dikenang sebagai pendidik anak bangsa ( 1978-2017). Persaraan Ustaz Roslan bin Mohamed pada 5hb Januari 2017. Sedikit biodata mengenai ustaz Roslan :

Roslan dilahirkan di Kampung Relong, Kuala Lipis, Pahang pada 6 Januari 1957 merupakan anak ke-7 daripada 11 adik-beradik.

Beliau mendapat pendidikan awal di SK Relong, Kuala Lipis (1964-1969), Sekolah Menengah Ugama Padang Tungku, Kuala Lipis(1970-1975) sebelum melanjutkan pendidikan di Sekolah Tinggi Ugama Sultan Abu Bakar, Pekan Pahang (1976-1977).

Bertugas sebagai guru sementara di SM St Patrick Membakut, Sabah ( 1978-1991) dan SK Kerupang, Wilayah Persekutuan Labuan (1991-2011).

Pada 1 Mac 2011, beliau dilantik sebagai Penyelia Unit Pendidikan Islam di Jabatan Pendidikan Negeri Labuan.

Beliau dilantik pula sebagai Ketua Unit Pendidikan Islam di Jabatan Pendidikan Negeri Labuan pada 23 September 2013 sehingga bersara wajib pada 6 Januari lalu.

Roslan mendapat Latihan Kursus Dalam Cuti (KDC) ambilan 1989/1991 di Maktab Perguruan Gaya, Kota Kinabalu dengan Pangkat Cemerlang .

Pada tahun 1999 dan 2014, beliau menerima Anugerah Perkhidmatan Cemerlang (APC).

Antara jawatan yang pernah beliau sandang ialah Pengurus Tabika Perpaduan Kg Durian Tunjong selama dua penggal (2000-2001 dan 2001-2002), Ketua Biro Pelajaran Masjid Al Mutakkin Kerupang 2 selama lima tahun (2005-2010), imam dan khatib jemputan Masjid Al Mutakkin, Masjid Kg Durian Tunjong dan Masjid Kg Tg Aru, dan Setiausaha Pertubuhan Kegiatan Dakwah Islamiah Sekolah- Sekolah (Pekdis) Malaysia Cawangan Labuan (2011-2016) .

Roslan mendirikan rumah tangga dengan Rajima Daud pada 25 Disember 1982 dan dikurniakan 4 cahaya mata – dua lelaki

dan dua perempuan. Kini mempunyai tiga menantu dan tiga cucu.

“Setelah bersara, saya akan menumpukan sepenuh masa membantu keluarga dalam bidang perniagaan perabot jati,” katanya.



## KAU YANG KUKENAL

Wajah tenang  
Pada bicara sopanmu  
Pada perkongsian rencah rohani pada budimu  
Penjawat setia bertahun  
Menabur bakti kepada  
Masyarkat sepulau kasih  
Pada kata-kata kecindan  
Lucumu menghiburkan  
Tak lokek senyuman  
Kita terus bersahabat  
Pada jalinan kasihmu  
Tertumpah cinta pulau bertuah  
Menyambung perjalanan  
Kehidupan ke sebelah sana  
Terima kasih Tuan

Nanti kami singgah  
Sekali-sekala Ima Jati  
Jadi ingatan kenangan  
Perantauan 1978 ke 2017  
Pulangkah Pahang Darul Makmur rindumu bertahta  
Bilakah?  
Doamu pada Tahajut dan Duhamu  
Kami juga setulus doa  
Kebahagiaan sekeluargamu  
Duniawi dan ukhrawi....

**SAMSA HARRIS**

**Dedikasi khas untuk Ustaz Roslan Mohamed**

---

# **Lawatan Pemantauan Hari Pertama Persekolahan Tahun 2017**



**3 Jan 2017** – Pengarah Jabatan Pendidikan WP Labuan, En Raisin bin Saidin telah mengadakan lawatan pemantauan hari pertama sesi persekolahan tahun 2017 di dua buah sekolah sekitar Labuan iaitu di SJKC Chi Wen dan SK Patau-Patau.

Beliau diiringi oleh ketua-ketua sektor dan pegawai daripada Jabatan Pendidikan WP Labuan.

Dalam ucapan beliau di SJK(C) Chi Wen, memaklumkan bagi sesi pendaftaran tahun 1 bagi tahun 2017, seramai 1,568 pelajar tahun 1 telah mendaftar manakala bagi Tingkatan 1 seramai 1,202 pelajar telah mendaftar di sekolah-sekolah W.P Labuan. Pada Sesi lawatan tersebut Pengarah juga sempat beramah mesra dengan ibubapa.

En. Raisin bin Saidin juga mengucapkan syabas dan tahniah kepada warga sekolah yang telah berjaya menjalankan tugas pada hari pertama ini dengan baik. Beliau berharap agar kecemerlangan dalam mendidik anak-

anak murid dapat dipertingkatkan dari semasa ke semasa.

